

La carta a los Hebreos

Dios ha hablado por medio de su Hijo

1 ¹Récaram Sirat ima chihtá ehcuquin is cohtín quin áyjacro, ima chihtá ehcwayta acu. Bitá jat, bitá jat Sirat eyin quin bitara útara yajc ayir cuitar ehcujacro. ²Eyta cuar ah cutar, ruw̃ ár ojcor ima wacjí is quin áyjacro, ima chihtá ehcwayta acu. Sirat wacjí at icar bahnác wiquir chájacro, wacj imat ayin acu. Sir imát cajcan teyan bahnacan récaram wacjí ajc cutar waquí chájacro. ³Siran bahnaquin cuitar rehquí eyta wacjí cat bahnaquin cuitatro. Sir urá bitáratara wacjí urá cat im éytaro. Wacj imat cajcan teyan, cuacúr abán bahnacan im ajc cutar urá cutar bahn áytiro. Wacj imat uwat Sir tayar yajác túnjacro. Tayar tunir car, cuacúr Sir ima jor itro. Eyta ita rabar buc owár cajcan bítatara, abán bítatara, bahnác cuitar ayro.

El Hijo de Dios es superior a los ángeles

⁴Etarwan wacjí urán Sir cuacúr cacmín cuitro. Ey ajcan ayan tahnacro. ⁵Eyan “Sir wacjá” aww̃uro. Eyta aww̃úc etar Sir cacminrá ey owara cutiro. Sir imát ey ojcor uchta wajacro:

Bahan as waquijró. Ah wacaro: bahan ajmaráy quéneyro. Cuat Sirat ima cacmín ojcor éytara wátiro.

Sir wacjá ojcor uchta cat wajacro:

Asan ey acu tetró. Rahra cat eyan as acu waquijró, wajacro.

⁶Sir ima wacjá cajc uch cutar yehnyat, Sirat wajacro:

Ajmár cacmín cuacúr binat ey tamo ay sihw̃ar ajcán to beyátaro, wajacro.

⁷Cuat ima cacmín cuacúr bin ojcor wajacro:

Cacminát Sir chihtá cab rehti yajcaro. Sero cab rehti bir eyta camín éyinat cat Sir chihtá cab rehti yajcaro. Ocan tiw̃ti anir eyta, cacminát cat Sir chihtá wácati yajcaro.

⁸Cuat ima wacj ojcor wajacro:

Bahan Sir rehquít uwan etiti áyataro. Bah gobierno cuitar uw cayar yajti yajcaro. ⁹Bahat uw cayar yaj cun batro. Cuat ur ay bár yajquíc quehsuro. Bahan ur ay yájquibro. Eyta cuácayat Sirat bah caran cuít yehn áyjacro. Bah íw̃oquinan ahniro. Eyta cuar bahan ahnian bah íw̃oquin cuít chájacro, wajacro.

¹⁰Uchta cat wajacro:

Caru, récaram cajcan ican bahat chájacro. Cuacúr abá cat behmá ístirat chájacro.

¹¹Cajc cat, ica cat, cuacúr abá cat bahnáyqueyra. Cuat bahra tehmoti im eyta rehcaçãoqueyra. Oyan cumar sec bir eyta, cajc cat, abá cat eyta sec béyqueyra.

¹²Uwat sincuach bihsúr eyta, bahat cajc cat, cuacúr abá cat eyta bihswáyqueyra. Oya ibsoy bin tehmar eyta, bahatán cajcan teyan eyta tehmögenqueyra. Cuatán bahra tehmoti im eyta rehcaro. Bahra yara báreyra. China báreyra. Bur cut suw cut itro, wajacro.

¹³Cuat Sirat cuacúr cacmín quino wati ey, ima waqufj quínora bar wajacro: Asi jor uw ayin acu cara chaw̃i. Aját bah quehsí bin bah ac burbar yajquinro. Eyta burbar yajca rabar asi jor cara chaw̃i, wajacro.

¹⁴Cuatán cuacúr cacminán cárini batro. Eyinra uw cuitar yájquinro. Sir imát uw síwata eyin racar rehquít cacminán eyin quin áyquinro, eyin cuitar yajquín acu.

No hay que descuidar la salvación

2 ¹Eyta cuácayat isat chihotá eyan yají cácataro. Sir chihotá is cucajá acat ehcujác eyan yají cácataro. Eytair báreyra chihotá eyan isat semar istiti waca teta óraro. ²Récaji Sir cacmín cuacúr binat Moisés quin chihotá istiy ehcujacro. Cacminát cahmor ehcujác eyan eyta yajquín waquír chájacro. Bíyinatan cahmor chihotá cati rehjétara éyinan cuécujacro. Bíyinatan bach aujactar yarsa cuécujacro. ³Cuat ah cutatra Cara imát chihot istiy ehcujacro. Eyta cuácayat isat chihotá ey rahcti réhcyeyra, ¿isan cab rehti cuécwajaqui? Car imát chihotá ehcujác ey cahujinat imár cucách cuitar rahcuír car acsar is quin ehcujacro. ⁴Eyinat is quin ehcwayta acu Sirat eyin ur icar ima ajcan urán chájacro. Bitara útara icúr bár sicar ay yajquín acu ajcan urán eyta chájacro. Istiy quin, istiy quin eyta wíjacro. Sir Ajcan Cámuran ima chihotá cuitar eyta wíjacro. Isat éyinat ehcuquey rahcuayta acu eyta wíjacro.

Jesucristo, hecho como sus hermanos

⁵Sirat cajc uch bahnár car, bucoy istiy cuanáyqueyra. Eyta cuanír car, ima cuacúr cacmín at icar chaca báreyra. Aját cajc ey ojcor waquín cuihsuro. ⁶Sir carit cuitar bi at icar chácatatara ehcún acu uchta récaji cuihsú bahjacro:

Siru, bah urá bahnaquin cuitatro. Uwan ba ub cahmar cuáyitro.

Eyta cuar ¿bahatán uw tamo seh̃w̃ac waátaqui? ¿Bahat ey sehnác

waátaqui? ⁷Siru, bahatán eyan cuacúr cacmín owara cuwaytaan birách bár chájacro. Eyta chaquir cat behmá y ajcá ji chájacro.

Carin chájacro. ⁸Bahnác acu cayíb chájacro. Bahnác ey at icar chájacro, eyat ayin acu. Bahnác ey at icar chájacro, wajacro.

Etarwan uwat icuran biyan bahnác áyataro. Eyta cuar isat ítitan, uwat anto bahnaqui áytiro. ⁹Eyta cuar Jesús rehjéc tamo síhṽawi. Jesús cuacúr cacmín owara cuti ít áyjacro. Eyta ít ayir sicor cara chájacro. Eyan cacmín owara cuti rehca rabar uwat Sir tayar yajaquey eyat túnjacro. Sirat uwa sehnác rehca yat, eyat eyta túnjacro. Eyat tunin ac chinjacro. Eyta tunin chinjác tehmár Sirat eya sicor imáy ajcá ji chájacro. Cahujín quin ey tamo ayan cuít sihṽ áyjacro.

¹⁰Síratan im acu bahnác cuanír chájacro. Ima chihtá cuitar cuanír chájacro. Eyatan uw quir bin ima sasá chaquin séhṽajacro. Eyta chaquir im owár carin yin ayin sehṽar, Jesusan yarsa chin áyjacro. Jesús eyan Uw Súquibro. Eyta chin ayir cuitar Jesusat uwa caba sújacro. ¹¹Etar Sir acu chaquib cat Sir acu chájaquin cat bahnáquinan Sir acu sasaro. Imár owara binro. Eyta chihtara Jesusat ima chiwa ojcor “as rábinro,” wacaro. Rooti eyta wacaro. ¹²Sir carit cuitar ey ojcor wac bahjacro:

Aját ajmár rabin quin bah ojcor ehcunro. Uw sécuajac tac icar bahnaquin cucajá acat, bahat yajác ey chihtá ehcunro. Eyta ehcwá rabar tanro, wajacro.

¹³Bucoy cat Jesusat waquíc ojcor wacaro:

Aját Sir chihtá bahnác rahcuinro.

Bucoy cat wacaro:

Asan úsatro. Sasá as quin wijac eyin owatro, wajacro.

¹⁴Sir sasá cájaquin sibár jiro. Ar jiro. Eyta cuácayat Jesús cat sibár ji, ar ji yehnjacro. Uw sibár éytaan wan yehnjacro. Uw chinír eyta chinín acu eyta yehnjacro. Ima chinír cuitar uw chin ayquib burbar yajquín acu eyta yehnjacro. Sisrá m burbar cuaquin acu eyta chinín acu yehnjacro. ¹⁵Eyta burbar cuaquir, uwan ey at icar bin siwin acu sibár ji, ar ji yehnjacro. Uwan chiníc cahmar ehúr ey cuiquín acu sibár ji, ar ji yehnjacro, uwa ohbac ítayta acu. ¹⁶Etarwan Jesusat ima cuacúr cacmín cuitar yajquín séhṽari rátiro. Cuat Abraham bómcarin cuitar yajquín sehṽar rajacro. ¹⁷Eyta bira cajc uch cutar raquir car ima rabin chaquir eyta chájacro. Ima uw cuitar Sir ub cahmar waquín acu, sacerdote yehnín acu uwan ima rábinan wan chájacro. Ima rabin racar cue rehquít eyin cuitar yajquín séhṽajacro. Eyin cuitar yajquín acu cat, Sir chihtá wácati rehca yat acu cat éyinan wan yehnjacro. Eyta yehnár Sir tamo sehṽa rabar, uwat Sir tayar yajác eyat túnjacro. Sacerdote yehnár eyta yajacro. ¹⁸Eyta uw acu rabir yehnyat ruhṽujacro. Ey quin ur ay bár yajc ayin yehnic cuar eyat eyta yájtiro. Eyta yajti etar uwat ur ay bár yajti acu síuro. Uw quin ur ay bár yajc ayin séhṽayat eyat uw eyin síuro.

Jesús es más importante que Moisés

3 ¹Rábinu, eyta cuácayát Jesús tamo síhw̄awi. Baan Sir imáy cájacro. Ima chihtá cuitar itin acu cájacro. Sir cuacúr binat baan ima chiwa cájacro. Etar Jesús tamo síhw̄awi. Jesús eya Sir imát is quin ima chihtá ehcwáy áyjacro. Eya sacerdote cara yehn áyjacro, Sir quin is cuitar waquín acu. Isat eyta ehcuro. ²Sir imát Jesús quin sacerdote yehn ayjac etar, Jesusat ey chihtá wácati yajacro. Moisesan Sir uw owár cuácayát, eyat Sir chihtá wácati yajacro. Moisesat Sir chihtá wácati yajquír eyta, Jesusat cat eyta yajacro. ³Eyta cuar Jesús ítitan, Jesusan caran Moisés cuitro. Uchtaan wanro. Uwat ubach tuw̄ro. Tuw̄yat uwat wacaro: “Ubach eyan ayro,” wacaro. Eyta waquíc cuar, ubach tuw̄quib eyan ayan cuitro. Tuw̄quib eyan ayan ubach cuít eyta Jesusan caran Moisés cuitro. ⁴Ubach tuw̄jác eyan uwat tuw̄jác eyta icuran biyan bitara útara ey cat bahnác Sirat chájaquinro. ⁵Moisesat Sir uw owár cuácayát, Sir im ac ruoquib rehquít wácati yajacro. Sir chihtá uw quin ehcúc canár ruojocro. Awan semar bitara rehcatatara, eyat récaji ehcú bahjacro. ⁶Jesusat cat Sir uw owár cuácayát, Sir chihtá wácati yajacro. Cuat Sir ima waquj̄ rehquít, Sir uw ac cara yehnjacro. Sir uwan isan éyinro. Eyat is cuacúr itay beyic acor wácati ítictara, isan ey uwro. Isan cahujín ub cahmar ayú bár Sir chihtá wácati ítictara, isan ey uwro.

El descanso para el pueblo de Dios

⁷Eyta bira baat Sir Ajcan Cámuran Ey chihtá rahcwi. Ey chihtá caw̄i. Eyat wajacro:

Ah cutar Sirat wajác ba cucáj acat, ⁸ey chihtá ráhctira yajti jaw̄i. Sirat wacaro: “Ba cohtinát cajc buru catu cut as ajc rahcti ruh̄w̄ujacro. As tec chíjacro. Eyinatan Meribá cubar cut, Masah cubar cut as ajc rahcti ruh̄w̄ujacro. Eyinat rahcti ruh̄w̄úr eyta, baatrá éytara yajti jaw̄i.

⁹Aját ur ay yajcan imarat bar itchacro. Aját bara cuarenta cuitar eyin bucoy cat, bucoy cat ay obír yajacro. Eyta yajác itchác cuar, as tec chíjacro. ¹⁰Etar ba cohtinát eyta yajác etar as túrjacro. Turir ajmár urá séhw̄ajacro: ‘Eyin urá bucoy bucoy tehmore. Bucoy cat, bucoy cat as chihtá cati ruh̄w̄ujacro,’ séhw̄ajacro. ¹¹Etar éyinat tec chícayát, aját turir cat wajacro: ‘Aját ajc istán waquinro. Eyin cajc ay bi cutar ohbac it áytiro,’ wajacro. ‘In et cuanti erar it aya báreyra,’ ” wajacro, Sirat.

¹²Rábinu, eyta cuácayát yají rahcwi. Eytair báreyra, ¿ba ur ay bár waajaqui? ¿Sirat is síwajar síhw̄ajaca? Eyta síhw̄ayeyra, eyta waáyera Sir cámuran to bi chihtá rahcti wácayqueyra. ¹³Sir chihtá wácati acu ba rahra rahra tan wan tew̄i. Ah cutar cuar ita rabar búcoyan búcoyan séoti eyta tew̄i. Eyta tew̄yat, baat ur ay bár icar aya báreyra. Sir chihtá rahcti ita báreyra. ¹⁴Sirat is síwataan isat wácati síhw̄ataro. Cabar tinic oco tas cuar eyta síhw̄ataro. Eyta yajcáyatan isan Jesucristo urán wan síhw̄ayqueyra.

¹⁵Sirat wac bahjác úchtaro:

Ah cutar Sirat wajác ba cucáj acat tew̄yat, ey chih̄tá ráhctira yajti jaw̄ i. Ba cohtinát as ajc rahcti ruh̄w̄ úr éytara, baatrá ráhctira yajti jaw̄ i, wajacro.

¹⁶Bíyinat Sirat wajác cucách cuitar rahcuíc cuar cati ruh̄w̄ujáctara, aját eyin ojcor ehcunro. Egipto cajc cut bin acsar waa rojóc im éyinat cati ruh̄w̄ujacro. Moisesat siu rojóc im éyinat Sir chih̄tá cati ruh̄w̄ujacro. ¹⁷Biyin acu Siran bara cuarenta túrjactara, aját eyin ojcor ehcunro. Ur ay bár yajaquin acu túrjacro. Turir cajc buru catu cuitar eyin tíw̄ jacro. ¹⁸Bíyinan Sirat cajc ay bi cutar ohbac it ayti síujactara, aját eyin ojcor ehcunro. Sir chih̄tá rahcti ruh̄w̄ujáqueyinan cajc ay bi cutar it ayti síujacro. ¹⁹Etarwan éyinat Sir ajc rahcti etar cajc ay bi cutar ohbac itin acu ajc waati rehjecro.

4 ¹Eyta cuácayat isan tan camti chácataro. Sirat uwan ima jor tan jaquin wajáquinro. Sir imatan ajc tehmoti eyta tan jaquin wajáquinro. Sir chih̄tá ey rahcuíc cab echí cuácayat, isan tan camti chácataro. Eytair báreyra ¿ba sicar bin cahujinat Sir chih̄tá rahcti rehca rabar rahcuata cuitar cab chac bahjaqui? ¿Sir jor tan wan it ayti síwajaqui? ²Chih̄tá ay bi eyin quino cat, is quino cat ehcujacro. Cuat eyin quin ehcujác cuar, éyinat rahcti yajacro. Sir ima chih̄tá rahcti yajác etar Sir jor tan wan ítiti rehjecro. ³Cuatán is Sir chih̄tá rahjác binan ey chih̄tá cuitar tan jaquin ac yinjacro. Rahcti eyin quin Sirat wajacro:

Ba ac turir car chih̄tá tehmoti acu ajc istán waquinro. As tan jaquir eyta, bara asi jor in et cuanti eyta tan jaca báreyra, wajacro.

Récaram Sirat cajcan bahnác chac tihrjacro. Bahnác cuan tihrjacro.

⁴Sirat carit cuitar wajacro. Cucwoy ricar ojcor uchta wajacro:

Cucwoy rícaran Sir imát cajcan teyan bahnác chac waar tan jájacro, wajacro. ⁵Bucoy cat uch ojcor wajacro:

As tan jaquir eyta, éyinan asi jor eyta tan jaca báreyra, wajacro.

⁶Sirat ima jor tan jaquin wajác cuar, Moisés owár béquinan eyta tan jacay yíntiro. Eyinat chih̄tá ay bi cucáj cuitar rahcuíc tacat, ur icar cátiro. Eyta cati rehquít Sir jor tan jacay yíntiro. Moisés owár bequin yinti cuácayat, cahujín Sir jor tan jacay yinata binro. ⁷Eyta cuácayat Sirat cab istiy chájacro. Ey jor tan jacay yiníc cuitar cab istiy chájacro. Itchareht, yájcjareht, úchicri cuácayat, Davidat Sir ajc cutar cab ey ojcor ehcujacro. Ah cutar ojcor ehcujacro. Cahmoran uchta ehcujacro, ah cutar binat rahcuayta acu:

Ah cutara chih̄tá eyta eyan baat cucáj cuitar rahcuíctara, ba ur icar cátiro yajti jaw̄ i.

⁸Récaji Josueat israelin Canaán cajc cutar rociyat, eyin ohbac tan chátiro. Josué chih̄tá cuitar eyin tan chájaquir waquít, Sirat tan jaquin acu cab istiy icúr acui chácajar binro. ⁹Etarwan Sir tan jaquir eyta, im uw cat eyta tan jaquin acu anto cab bahnác chac báhtiro. ¹⁰Bíyinan Sir tan jaquir eyta tan jacay yínyatan, éyinan acsar canar ruo báreyra. Sirat canar yajquíc etchác eyta, Sir uwat cat im eyta etáyqueyra. ¹¹Eyta bira isan ijmár cuitatrun eyta jaw̄ tan jaquin ac chih̄tá ey cácataro. Eytair báreyra, is sicar bin cahujinat cat Sir chih̄tá

rahcti rehçáyqueyra. Eyta tan jaquin acu yinti rehçáyqueyra. Israélinat rahcti rehquít tan jati rehquír eyta is sicar bin cahujín cat eyta rehçáyqueyra.

¹²Sir chihotá ajcan urán tahnacro. Espada ruhra bucáy biyan wanro. Espada ey cut sur yarsa quejquír eyta Sir chihotá cuitar ijmár urán bitáratara, ijmár tanan bitáratara itchácayqueyra. Ur icar bitár síhwãactara, ur cuitar icúr yajca rácartara bahnác itchácayqueyra. ¹³Eyta cuácayat isat bitara útara ay bár yájquíctara, Sir ub cahmar rúhcujatro. Is bahnáquinan ey ub acat waátaro. Ehcuci ruhcuu racar tacat bitách rúhcujatro. Ey cac cahmar waar ehcwátaro. Isat bitara yajáctara ey quin ehcwátaro.

Jesús es el gran sumo sacerdote

¹⁴Is cuitar Sir quin waquín acu istiyá sacerdote cara yehnjacro. Eyan caran cuitro. Eyan cuacúr abá cuitar Sir ima quin cujacro. Jesús eyan eyro. Eyan Sir ima waquijró. Eyta bira isat ey chihotá cajac ey wácati chácataro. ¹⁵Is cuitar waquib quin is sacerdote cara quin Jesús quin Sisramat ur ay bár yajc ayit cat, yajti rehjecro. Is quin bitara útara ur ay bár yajc ayir eyta, ey quino cat eyta yajc ayit cat, eyat ur ay bár yajti rehjecro. Etarwan Uw Sfuquib sacerdote cara eyat is tamo sehwar cue rehquír isat ur ay bár yajti acu síwayqueyra. Is istir tan úcajar etar, isat ur ay bár yajti acu síwayqueyra. ¹⁶Eyta bira isat Sir ojcor rooti conátaro. Eyta rooti conyat, Sirat is cuitar yajçáyqueyra. Ijmarat istir tan úcajar etar, eyat is racar rehquít is cuitar yajçáyqueyra.

5 ¹Sacerdote cárinan uw cuitar Sir quin waquín acu caquir yin ayro. Uw tac icar bin caquir yin ayro. Uw cuitar waquín acu sacerdote carin yin ayro. Eyta yinír uwat Sir tayar yajác tunin acu ruwa yauwir wahnro. Uw cuitar Sir acu racar wícata bin cat wícaro. ²Uw cuitar waquín sacerdote carin cat is uw sicar binra, éyinat cat ur ay bár yajcaro. Eyta rehquít istiti eyin quin, urá bár eyin quin técuati siwro. ³Eyta bira uwat ay bár yajác tayar cat, imarat ay bár yajác tayar cat, tunin acu ruwa yauwir wahnro.

⁴Uw ima chihotá cuitari sacerdote cara yehná báreyra. Ima chihotá cuitar yehnti cuar, Sir imat eyta yehnín acu cácaro. Sir imat Aarón sacerdote cara yehnín acu caquir eyta, sacerdote carin yinín éyinra Sir imát cácata binro. ⁵Eyta cat Jesucristoan ima chihotá cuitari sacerdote cara yéhntiro. Cuatán Sir ima chihotá cuitar sacerdote yehnín acu uchta waquír cájacro:

Bahan as waquijró. Ah wacaro: “Bahan ajmaráy quéneyro,” wajacro, Sirat.

⁶Carit istiy icar uchta cat wajacro:

Bahan sacerdotéan bur cut suw cut rehçáyqueyra. Melquisedec sacerdote yehnjác eyta, bah cat eyta yehnáyqueyra, wajacro, Sirat.

⁷Jesús cajc uch cutar ita rabar, Sir ojcor conjacro. Sir quin chíjacro. O rabar conjacro. Jesusat ima yau ayti síwata Sir quin chíjacro. Sir ima chihotá cuitar siu cúntara eyta síwayta acu conjacro. Eyta cona rabar Jesusat Sir ima chihotá yajca racar rehjecro. Eyta yajca racar conyat Sirat rahjacro.

⁸Jesús Sir waquj cuar, uwat ruhwujacro. Ruhwayat icar awãt Sir chihotá

tehmoti yajquíc sínjacro. ⁹Eyta caba sinjac rehquít, imát uw bahnaquin siwin acu yehnjacro. Eyatan uw eyta síuyat, uwan cuacúr Sir jor bur cut suw cut ítataro. Ey chihotá cac éyinan Sir jor ítataro. ¹⁰Caba sinjac etar Melquisedec sacerdote cara yehnjác eyta, Sirat ey cat im eyta yehn áyjacro.

Peligro de renunciar a la fe

¹¹Ey chihotá ojcor isat cuít ehcún síhw̄aro. Eyta cuar baat orac rahcuayta ehcún acu canarán abayro. Baat ey chihotá rahcuí cun bár etar isat ay éhcwajatro. ¹²Baatán Sir chihotá rahcuay ocujacan úchicriro. Ah cutar baat úchicri cahujín siw̄ ic icar chácata binro. Baat eyta siw̄ ic icar chácata bin cuar baat síw̄tiro. Baan siw̄quin táyoro, ba acsar siw̄ in acu. Chihotá baat récaji rahjác eya bucoy sinin acu siw̄quin táyoro. ¹³Buwáchcuarat ira ubir cohjor eyta baat cat chauwan cuít bi sínajatro. Buwáchcuarat sutá suhw̄ir eyta baat cat chihotá récaji rahjác ey bucoy bucoy rahcuír sínataro. Baat ur ay yajquíc ayra síntiro. ¹⁴Eyta cuar bíyinat icúr áytara, icúr ay bártara istíc sínnyatan, éyinat acsar chihótán cuít sínataro. Eyinat ur ay yajca rabar bitara yajcátatara sínjacro. Sasá bahnác cun tihryat ira ubir coh eyta, sinjac éyinat cat acsar chihotá cuít sínataro.

6 ¹Eyta bira Jesucristo chihotá cahmor sinjac eyra bucoy bucoy icúr obir sínajatro. Ey chihotá caba sinjac etar icúr obir sínajatro. Eyta cuácayat Sir chihotá acsar ey cuít sínataro. Bihtín urán wan rehquín acu acsar sínataro. Récaji isat ba quin ur ay bár yajquíc etata wajacro. Ay bár yajquíc tehmota wajacro. Bachan chihótán cuayir bi yajquíc ey etata wajacro. Sir tamoan síhw̄ata wajacro. ²Sir ub cahmor rih cut siw̄ata chihotá cat ehcuajacro. Sir Ajcan Cámuran Eyan uw ur icar chácayta acu átcara chaquíc chihotá cat ehcuajacro. Sácajaquin sicor yinata chihotá cat ehcuajacro. Cabar tinic cab cuacayat tayar yajác ques uw cuécwata chihotá cat ehcuajacro. Chihotá eya bucoy bucoy icúr óbiri síw̄ajatro. ³Eyta bira isat acsar síw̄ inro. Sirat is quin ajc waacayat, acsar síw̄ inro.

⁴⁻⁶Uw cahujinat ur icar Sir chihotá rahcuír sínjaquinro. Eyta sinir Sirat wiquey eyin ur icar cájaquinro. Eyin ur ícara Sir Ajcan Cámuran Ey wíjaquinro. Eyinatan Sir chihotá tamo ayan cuít síhw̄ajaquinro. Ajcan urán cuacúr bin eyin ur icar chájaquinro. Eyta cuar éyinat sicor Sir chihotá waca téjecro. Eyta waca tejec etar, eyin quin bucoy ur ay bitách tehmó áyajatro. Bucoy Sir chihotá bitách cac áyajatro. Eyinat Sir wacjá caruc ojcor yaujác éytaan wan yajcaro. Eyinat yájqueyan uw ubot Sir wacjá buror sisír eyta yajcaro. Imár chihotá cuitar Jesucristo bucoy bucoy ruhw̄uro. Eyta cuácayat eyin bucoy ur ayra bitách chac áyajatro.

⁷Ey uwa úchtaan wanro. Cajc cutara riwa ayir cuitar, cajc eyat rih ey suhwro. Eyta suhw̄ir rihat siw̄ jác cuitar ira yehnro. Sirat obir yajc etar cajc ey cuitar ira yehnro. ⁸Eyta cuar cajc ey cutar ira yehnti cuar, tihw̄ á yehnítara, cachá yehnítara, cajc eyan icúr acui batro. Eyta rehquít Sirat bar ruhw̄ átaro. Cajc eyan oc cut wahnátaro. Eytaan wan bíyinatan Sir chihotá rahcuír car wácati yajcáyatan, Sirat eyin obir yajcáyqueyra. Cuat bíyinatan chihotá ey rahcuír cat Sir ima chihotá yajti waca técayatan, Sirat eyin cuécwayqueyra.

La esperanza que nos mantiene firmes

⁹Chahrinu, isat eyta waquíc cuar, bara éytai bár óraro. Isat ba tamo síhwatan, Sirat ba síujacro. Ba síujac etar baat ur ay yajcaro. ¹⁰Baat Sir ac to yajacro. Baat Sir sehnác rehquít ey chiwa obir yajacro. Acsar cat eyta obir yajcaro. Eyta obir yajcayat, Sirat baat yajaquey istítira rehca báreyra. Síratra bahnác ay yaje etar istítira rehca báreyra. ¹¹Isat baan Sir chihtá cuitar tehmoti it ay cunro. Cuacúr bec oco tas, baan im eyta urá tehmoti it ay cunro. Ba eyta ityat, Sirat ba cuacúr bec acor ahní ítayqueyra. ¹²Eyta ityat baat Sir chihtá yajquín acu quehsír yar rehca báreyra. Sir imát is cohtín obir yajquín wac bahjác chihtán éyinat wácati cájacro. Sirat eyta yajquíc acor cohtín séoti ítchacro. Eyta ityat Sirat eyin obir yajacro. Baan eyta wácati, séoti yajcayat, Sirat ba cat obir yajcáyqueyra. Isat eyta síhwár baan eyta tehmoti it ay cunro.

¹³Sir imat Abraham ac yajquín wac bahjác chihtá síhwáwi. Uwat uní tew̃quey cahujinat istayta acu uchta wacaro: “Aját uní wátitara, Sirat as cuécwataro,” wacaro. Cuatán Sir ima cuít bin istiy bár etar, eyat uní wátitara, bíyati cuéwajatro. Eyta cuácayat Sirat Abraham ac imát yajquín waquín yehnyat, ima ajca aṽ úr cuitar wajacro: ¹⁴“Asan Sitro. Aját uní wacaro. Aját bah ac ay yajquínro. Bah bómcara saw̃ ú bálnajar wíquinro,” wajacro. ¹⁵Etar Abrahaman Sirat eyta wíquin wac bahjác yajquíc acor séoti ítchacro. Eyta ítchareht Sir chihtá cuitar Abraham bomcarin saw̃ ú bálnajar cohná bijacro.

¹⁶Siran uw bahnaquin cuitatro. Etar uwat uní wajác ey cahujinat rahcuayta acu Sir cac cahm waquíw tew̃ro. Uwat rahra rahra tecuay yinyat, uní wajác istayta acu uchta wacaro: “Aját uní wátitara, Sirat as cuécwataro,” wacaro. Eyta wacayat, bahnáquinat ítitan, uní wacaro. ¹⁷Eyta cat, Sir imát wac bahjác eyan, sicor wácati yajcata rehjecro. Sicor wácati yajcata chihtá uw quin rahcua ay cun rehjecro. Eyta rahcua ay cun cuar, Sir ima cuitra istiy batro. Bi cac cahmarí wácajatro. Eyta cuácayat ima ajc eya aṽ úr cuitar wajacro. ¹⁸Eyta cuácayat Sir ima ajc aṽujác etar, Sir imát wajác etar bitách téhmojotro. Imát wajác cuitar jaw̃ im ajc aṽ úr cuitar jaw̃ wajác etar téhmojotro. Eyta cuácayat Sir chihtá wac bahjác ey isat bayuti rahcuátaro. Isat ey ojcor is siwin conyat, eyat is siwin wajacro. Sirat eyta wajác etar is siwic acor ahní ítataro. ¹⁹Eyta jaw̃ is quin wac bahjác rehquít sicor téhmojotro. Waca báreyra. Sir imát cuacúr cuar wajác etar eyta yajquíc acor isan ahní ítataro. ²⁰Cuacúr Sir ima jor Jesús is cuitar wacáy is cahmor bijacro. Eya sacerdote cara yehná, Melquisédequin urán wan sacerdote yehná, Sir jor etiti rehcaro. Sir quin is cuitar etiti wacaro.

Jesús, sacerdote de la misma clase que Melquisedec

7 ¹Melquisedec eya pueblo Salem cara chájaquinro. Melquisedec Sir cac cahm sacerdote yehnjáquinro. Cuacúr Sir bahnác cuitar ey cac cahm sacerdote yehnjáquinro, uw cuitar waquín acu. Abraham cajc

istiy reyin burbar yajquír, sicor racayat, tihrjacro. Ey racayat acam bir tihrjacro. Tihrír cat Melquisédec at Abraham quin wajacro.

—Sirat ba cuitar yajwĩ i, wajacro.

²Melquisédec at eyta tihryat, eyta wacayat, Abrahamat ima oya sicar cat, ray sicar cat, at cut ruwa yehw̃ rojóc sicar cat, ucasi bin sicar úbisti, ucasi bin sicar úbisti, ucasi bin sicar úbisti, Melquisedec at icar wíjacro. Aje “Melquisedec,” aw̃ úc eyra cara reya urá ay bin ojcor wacaro. Ey pueblo Salem cuitar reyro. Aje “Salem” aw̃ úc eyra tan wan itic ojcor wacaro.

³Melquisedec tet ójcotra, ey ab ójcotra, ey cohtín ójcotra icuri ehcutiro. Ey yehnjác ojcor cat, werjáy cutar chinjác ojcor cat icuri ehcutiro. Bitár yajáctara ey ojcor ehcuti etar, eya sacerdote tehmoti im eyta rehcaro. Eyta ojcor ehcuti etar Sir waquíj rehquír éytaan wan rehcaro.

⁴Ey caran cuít rehcaro. Eyta etar récaram cohtá Abrahamat oyan, rayan, at cut ruwan, icuran biyan sújac bin sicar, ucasi bin sicar úbisti, ucasi bin sicar úbisti, ucasi bin sicar úbisti ey at icar wíjacro. ⁵Levítinat yajquír eyta, Melquisédec at cahmor yajacro. Leví bómcaro cohná bahjáquinan sacerdotéin yinjacro. Levitin sacerdotéin yinjacro. Sacerdotéin yinjaquin acu uwat racar wícata waquír chájacro. Uwat icuran biyan sícara, ucasi bin sicar úbisti, ucasi bin sicar úbisti, ucasi bin sicar úbisti wícata waquír chájacro. Bachan chihntán carit cuitar eyta wíquin cuihsú bahjacro. Leví rabin Abraham imát cohná bahjác cuar, ey bomcarinat Levitin acu wíquin waquír chájacro. ⁶Melquisedec eya Leví bómcarin uwi batro. Levítini batro. Eyta cuar Abrahamat ey acu icuran biyan ucasi bin sícara úbisti, ucasi bin sícara úbisti wíjacro. Sir imát Abraham ac ay yajquín wac bahjác cuar Abrahamat Melquisedec ac racar wíjacro. Eyta wícyat Melquisédec at Abraham cuitar sehwar wajacro: “Sirat ba cuitar yajwĩ i,” wajacro. ⁷Uch síhw̃awi. Uw bahnáquinat ítitan, caran cuít eyat chiwa cuitar wacaro. Etarwan Melquisédec at Abraham cuitro.

⁸Leví bómcarinra sacerdotéinan ítchareht istiy istiy yarata cuar uwat eyin ac racar icúr bi sicar wícaro. Cuatán Melquisédecra yarti binan wan rehcaro. ⁹⁻¹⁰Levitin tamo uchta síhw̃awi: Levitin anto Abrahamat cohnti cuácayat, Abraham imát imáy sicar bin Melquisedec at icar racar wíjacro. Abraham imát Melquisedec quin racar wícyat, Levitin imárinat cat wíquir éytaro. Levítinan Abraham imát cohnata etar Abrahamat racar wícyat Levitin imárinat wíquir éytaro.

¹¹Levítinat uw cuitar Sir ojcor caba conata sehwar, Moisesat ima chihntá siw̃ bahjacro. Eyta cuar Levitin chihntá cuitar uwan Sir ub cahmor orac chácajatro. Orac chácaatair waquít Sirat sacerdotéin téhmojoj binro. Sacerdotéin Levítinan úcajar binro. Aarón sacerdotéan wan chájaquinan úcajar binro. Eyin chihntá cuitar orac chácaatair waquít sacerdote istiy icúr acui chácajatro. Melquisedec urán wan bi icúr acui chácajatro. ¹²Cuácayat cat sacerdote tehmoýatra, bachan chihntán cat tehmojo. ¹³Eyta tehmar istiy chácayat sacerdote Levítini chácajatro. Eyta tehmar cháqueyra récaji chati bin sicar chájacro. Sir usi ruón acu récaji ruoti bi sicar chájacro. ¹⁴Eyta cuácayat is Cara Jesucristora Judá bómcatro. Cuácayat cat Judá bómcarin sicar sacerdote yinín ójcotra Moisesat

icuri ehcuti báhtiro. Eyta cuácayat Jesucristo sacerdote yehnín acu bachan chihtán cat, sacerdotéin cat tehmojcro.

¹⁵ Sacerdote istiy Melquisedec urán wan bi yehnjacro. ¹⁶ Eyra sacerdote bomcar sicar bini batro. Eyta bár cuar, sacerdote yehnjacro. Moisesat wac bahjác chihtá cuitari yéhtiro. Cuatán eyra cuácajar bi, yárajár bi rehquít, sacerdote yehnjacro. ¹⁷ Sir carit cuitar ey ojcor wajacro:

Bahan sacerdote bur cut suw cut rehcaçãoqueyra. Bah cat Melquisedec sacerdote rehquír eyta rehcaçãoqueyra, wajacro.

¹⁸ Bachan chihtán récaji wac bahjác cuitatra caba yácajatro. Chihtá eyra cábai bár etar tehmojcro. ¹⁹ Chihtá ey cuitar uw ur ay waajar etar tehmojcro. Cuatán chihtá istiy ayan cuít bi waquír chájacro. Ey chihtá cuitar isan Sir owár tan wan chácaro.

²⁰ Sacerdotéin tehmar istiy chajac eyra, Sirat ima ajc aw̃ úr cuitar chájacro. ²¹ Récaji uwa sacerdote yinín ácuán, icuri tew̃ti cuar yinjacro. Cuat istiy chajac eyra tehmoti acu ima ajca aw̃ úr cuitar chájacro. Sir carit cuitar wacaro:

Sirat ima ajca aw̃ úr cuitar uní wajacro. Ajc istán tehmoti wajacro:

“Bah sacerdote bur cut suw cut rehcaçãoqueyra,” wajacro.

²² Etarwan chihtá ayan cuít bi is quin wac bahjacro. Jesús ima tehmoti acu sacerdote yehnjacro.

²³ Cahmotra sacerdotéin ricá quir bin yinjacro. Itchareht yácajareht istiy yaryat, istiy yaryat uw cuitar waquíc cat et bahjacro. Yaryat, uw quin Sir chihtá ehcúc cat et bahjacro. Eyta etar ricá quir bin istiy cat, istiy cat yinjacro. ²⁴ Cuatán Jesús yehnár yarti im eyta estají rehcaro. Etarwan eya sacerdote tehmoti rehcaro. ²⁵ Sacerdote tehmoti rehquít, uwa siwir car, bur cut suw cut eyin obir yajcaçãoqueyra. Bíyinan ey chihtá cuitar Sir acu sasá jácayatan, eyin cuitar bur cut suw cut wacáqueyra.

²⁶ Sacerdote cara is cuitar caba wacata eyan Jesusan eyro. Eyan Sir imáy ajquír chájacro. Eyatan Sir tayar yajti binro. Ur ay batra yájtiro. Eyan ur ay bár bin owari batro. Eyan Sir owár cuacúr itay bijacro. ²⁷ Cáhmotra sacerdotéinat riy istiy, riy istiy, riy istiy imarat Sir tayar yajác ibtu túnjacro. Eyta tunin acu uchta yajacro. Ruwa yawwir wahnjacro. Imarat Sir tayar yajác tunir yahncút uwat Sir tayar yajác cat tunin acu bucoy ruw wahnjacro. Cuatán Jesusra tayar bár etar ruwa icúr acuí wáhnajatro. Acsar uw cuitar tayar tunin ac bucoy bucoy ruwa wáhtiro. Bucoy bucoy wahnti cuar uw cuitar caba tunin ac ima yawwin acu ajc waajacro. Eyta yawyat, icar istán yawyat uwat Sir tayar yajác ey caba tun waajacro. ²⁸ Cáhmotra bachan chihtán cuitar uwan tayar ji binan, sacerdotéin yinjacro. Eyta cuar bachan chihtán tehmo yahncút Sirat ima ajc aw̃ úr cuitar ajc istán wajacro. Eyta waquír ima wacjá sacerdote yehnín wajacro. Wacjá eya bur cut suw cut tayar bár caba rehcaçãoqueyra.

Jesús, abogado de un nuevo pacto

8 ¹Etarwan isat ehcujáqueyan úchtaro. Is cuitar waquín acu urá ayan cuít bi sacerdote yehnjacro. Jesucristoan eyro. Eyan cuacúr Sir owár itro. Buc owár uw acu carin rehcaro. ²Cahmor sacerdotéinat ruw umá usi Sir quin uw cuitar conjacro. Im éytaan wan Jesucristo sacerdote yehná r cat uw cuitar conro. Cuatán éyatra, cuacúr Sir ima jor rehca rabar conro. ³Sacerdote cárinat uw cuitar Sir quin waquín acu ruwa cat, ira cat wahnár wiquin waquí r chájacro. Im eyta cat isat ítitan, Jesucristoat Sir quin uw cuitar waquín acu icúrtara wícataro. ⁴Jesucristo caje uch cutarir waquí t, eya sacerdote yéhnajatro. Caje uch cutra bachan chihtán cuitar sacerdote yinír ruwa wáhnquinra chero. ⁵Sacerdote caje uch cutar éyinatra Sir ac yajcata bi éytaan wan yajcaro. Eyta cuar eyra cabach batro. Cahmor Sir tamo sihwán ac ruw umá ubach tuwín rehcyat, Sirat Moisés quin bitara tuwátatara ehcujacro. “Cúbara cuitar bah quin bitara tuwín ehcujáctara, bahat eta jaw tuwí. Eta jaw tehmoti tuwí,” wajacro. Etarwan cuacúr cuitar Sir ub cahmor caba yajquí r eyta caje uch cutar eyta yajquí t cat cabach yájtiro. ⁶Eyta chihtara Jesucristo is acu sacerdote yehná r cat eyat yájqueyan ayan cuitro. Sacerdote cahujinat yájqueyra cutiro. Siran uw owár tan wan chaquin acu chihtá tewjáqueyan Jesucristo eyat caba órojocro. Ey chihtán ayan cuitro. Cahmor sacerdote chihtá eyra cutiro. Sirat imát sacerdote chihtá cuitar bitara yajquí n wac bahjáctara ayan táhnaqui batro. Cuatán Jesucristo chihtá cuitar Sirat uw ac bitara yajcata eyan ayan cuitro.

⁷Chihtá cahmor chájaqueyan caba rehjequir waquí t, yahncutra chihtá istiy icúr acui chácajar binro. ⁸Cahmor chihtá eya cábai bár etar Sirat sehwar uchta wajacro:

Sirat wacaro: Itchareht yájcajareht asan israelin owár, judain owár tan wan chaquin acu chihtá istiy cháquinro. ⁹Aját eyin cohtín Egipto caje cut bin siwir cat eyin acu chihtá chájacro. Chihtá cohtín ac chaquir eyta, eyta bin chaca báreyra. Eyin acu chihtá ajquí r bin cháquinro. Aját eyin cohtín sehnác rehquí t síujacro. Síujac cuar, éyinat as chihtá cájaquey waca



(Hebreos 8.5)

téjebro. Eyta waca técayat aját eyin obir yajti ajcá bár téjebro, -wajacro, Sirat. ¹⁰Etar cab cucayat aját chihtá istiy cháquinro. Israelin owár tan wan chaquin acu chihtá istiy cháquinro. Chihtá eya aját eyin ur icar cháquinro. Eyin ur icar imarat bitara yajcátatara chihtá cháquinro. Etar asan eyin acu Sir rehquít obir yajquinro. Rahra cat éyinan as acu ajmár sasá rehcaýqueyra. ¹¹Chihtá bahnaquin ur icar chácayat, éyinat cahujín quin siw̄a báreyra. Rabin quin “Sir tamo sihw̄an acu sinwi,” waca báreyra. Bahnáquinat, cárinat cat, cuáyinat cat as urán bitáratara it etar, icúr acui síw̄ajatro. ¹²Ajátán éyinat as tayar yajác tamo sehwa báreyra. Eyinat tayar yajác eyan aját sicor tayar bár cháquinro.

Sirat carit cuitar eyta wajacro. ¹³Sirat chihtá istiy ojcor wacaro. Eyta waquíc etar récaji chihtá tew̄ jáqueyra bar tehmojocro. Bi tehmar̄ tehmojóctara, cahmor eyra cúmarir wa bahr chac bahcaro. Bucor wati acu chac bahcaro.

El santuario en la tierra y el santuario en los cielos

9 ¹Chihtá récaji wic bahjác cuitar Sir tamo sihw̄an acu uwat bitara yajcátatara waquíc chájacro. Chihtá eyta chajac ey cuitaran ruw umá ubach bitara tuw̄ átatara wajacro. ²Etar cajc uch cut uwat ruw umá ubach uchta tuw̄ jacro. Ubach tan sar wahw̄ ún acu oya quer ricarwar rújacro. Quer watar wihár ey tan sar oca teba cat, pan mesa cat oror chájacro. Eyta oror chajac ey cuitar pan cat chájacro. Quer watar wihár ey tan sar Sir ojcor conic usi aw̄ujacro. ³Oya quer wicán sar usi istiyró. Ey ojcor Sir wiquíc usi aw̄ujacro. ⁴Sir wiquíc usar inan ay bi wahnín mesa chájacro. Ey sar Sir cajón cat chájacro. Cajón ey cuitchín oro ánjaquinro. Oro soya cat cajón ey sar chájacro. Oro soya sar cucuán wan cuasáy bi ajca maná chájaquinro. Cohtá Aarón tec cat cajón ey sar chájaquinro. Tec ey ojcor suw bihnjáquinro. Sir ima chihtán ac ohná cuitar cuihsujác ey cat cajón ey sar chájacro. Cahmor cohtín acu Sirat yajác chihtá tan chinti sihw̄an acu cajón sar eyta chájacro. ⁵Cajón ey arcutar Sir cacmán wan órojocan bucáy chájacro. Sir cacmán wan órojoquey éctara chi órojocro. Sir ima esar rehce etar eyta chájacro. Eyta chaquir uwat ítitan, cajón ey cuitar ab cuic cuic chaquir cuitar Sir tayar tunro. Aját ba quin acsar ehcwata cuar chihtá ey bahnác icúr acui récaji éhcwajatro.



(Hebreos 9.5)

⁶Sir ruw umá ubach eyta oror cat sacerdotéin cuan istiy, cuan istiy Sir ojcor conic usi rauro. Sir acu inan ay bi wahnín ac rauro. ⁷Cuatán Sir wiquíc usi sacerdote caran bara icar icar istaná, bara icar icar istaná rauro. Esar rauwa rabar ab sijacan ator beya rabar rauro. Imát istiti rabar Sir tayar yajác cat, uw cahujinat istiti rabar Sir tayar yajác cat tunin ac ab ator bécaro. ⁸Sir Ajcan Cámuran Eyat ruw umá ubach icar eta jaw̃ yajquín wajacro. Uwat eyta yajquír itit, Sir ojcor conic cutar étana raúwata binro. Sir ojcor conic úsian anto tehmoti etar ey sar raúwata binro. Cuatán acsar Sir ima wiquíc satra raúwajar binro. Raúwajar chihtá síhw̃ayta acu eta jaw̃ yajquín wajacro. ⁹Sirat ah cutar yajcata chihtán uwat récaji síhw̃an acu ruw umá ubach icar eta jaw̃ yajquín wajacro. Uwat eyta yajquín wacayat, chihtá uch ojcor waquín acu cat eyta yajc áyjacro. Ruwa wahníc cuar, ritút wiquic cuar, uwa urá ayra waájatro. Ah cutar uwat ur ay waajar chihtá síhw̃ayta acu récaji eta jaw̃ yajquín wajacro. ¹⁰Bach cuácayat uwat icúr cóhtatara, icúr yáhtatara, bitara sucuátatara ey chihtá sinro. Sirat chihtá bahnác tehóc acat tas eyta bach yajcaro.

¹¹Bach eyta yajquíc cuar, íchareht Jesucristo sacerdote cara yehnjacro. Sirat uw ac icuran biyan ay yajquín bi eyan is acu eyta yajquín acu sacerdote cara yehnjacro. Eyta yehnár cuacúr abá cuitar Sir ima quin bijacro. Is cuitar waquín acu cuacúr abá cuitar Sir ima quin bijác etar, eyan ayan cuitro. Cahmor sacerdotéin ruw umá ubach cuitar rauwir car Jesucrístoat yajquír etach yájtiro. Ruw umá ubach sacerdotéin raujaquey uw im at cut tuw̃ jáquinro. Caje uch cut icuran biyan sícara tuw̃ jáquinro. ¹²Cuatán Jesucristo eyta yehnár cuacúr abá cut Sir ima usi raújacro. Icar istán rauwir cat, caba yajacro. Cahmor sacerdotéinat Sir wiquíc usar rauyat cabir ab cut, vaca ab cut, Sir tayar tunin síhw̃ar, ab ey béjecro. Cuat Jesusat cabir ab cuti, vaca ab cuti Sir tayar tunin ac beti cuar, icar istán rauwir im ab cut bahnác caba túnjacro. Bur cut suw cut tehmoti ac túnjacro. ¹³Sacerdotéinat cabir aban, vaca aban, vaca wahnjác buran uw cuitar cuic cuic chaquir cuitar Sir ub cahmar uw cuitchín ey sujacro. ¹⁴Cuatán Jesucristo chinír im aban to bijacro. Eyat ima urán ajcan tayar bár etar, uwat Sir tayar yajác tunin ac ima aban to bijacro. Eyat tayar yajti cuar, aban to bir chinjacro. Etarwan ima aban to bir cuitar baat ay bár yajác tayar sicor tayar bár chájacro. Isan ur ay bar yajác tayar ques sácata binro. Eyta cuar eyat isan tayar bár chájacro. Isan tayar bár chajac rehquít, Sir tamo caba síhw̃ataro. Sir ojcor caba conátaro.

El sacrificio de Cristo

¹⁵Eytaan chihtá yahncút ehcujaquey cuitar Jesucrístoat uwan Sir jor tan wan chaquin acu caba órojocro. Sir imát uw obir yajquín wac bahjác eyan caba rehcayta acu órojocro. Sir imáy cájaquin obir yajcayta acu órojocro. Sirat eyin im jor bur cut suw cut itin acu wájáquinro. Cahmor chihtá cuitar uwat caba yajti rehquít, Sir tayar yajacro. Eyta cuar eyta tayar yajác eyan tayar bár jaquin acu Jesús chinír cuitar túnjacro.

16-17 Uwat ima chinír cuitar imáy icuran biyan rehrín acu chac báhtatara ehcún acu carit cuitar cuihsú bahcaro. Anto chinti cuat echí cuihsú bahcaro. Eyat eyta cuihsú cuar, ima echí ityat, imáy icuran biyan cahujín quin chaw̄ wica báreyra. Biyin ac chac bahta cuihsujáctara, anto chinti cuatro eyin at icar wítiro. Cuatán cuihsujaquey bar chinjác chihtá ay ityat, eyin at icar wícataro. Eytaan wan Jesucristo chinyat Sir imat wiquin wac bahjác ey is quin wíjacro. 18 Etarwan chihtá cahmor wac bahjác ey cat aban to bir cuitar órojocro. 19 Cahmor Sirat wajác chihtá, Moisesat uw bahnaquin quin ehcujacro. Eyta ehcúr cuitar vaca sasá cat, cabir cat yawwir ab uhcujacro. Ab ey rih jaw̄ rihnór chájacro. Rihnór hisopo cárucua ojcor óbasa anará buw bi questajacro. Eyta questár ab ey sic siw̄ jacro. Eyta siw̄ ír, carit cuitar cat, uw cuitar cat ab ey cuic cuic chájacro. 20 Eyta cuic cuic chaca rabar wajacro: “Ab cuic cuic chaquey chihtá úchtaro. Baat Sir chihtá bahnác caquin waquíc chihtaró. Sirat rahra cat ba cuitar waquín waquíc chihtaró,” wajacro. “Ab cuic cuic chaquir cuitar ba quin ehcuro. Sir imát ba ac yajquín wajác eyan tehmoti yajcata ehcuro,” wajacro. 21 Carit cuitar cat, uw cuitar cat ab cuic cuic chájacro. Sir ruw umá ubach cuitar cat ab cuic cuic chájacro. Soya Sir usar bin cuitar cat eyta chájacro. 22 Eyta cat Moisés bachan chihtán cuitar bahnác Sir ub cahmar tayar chaquin acu ab beta binro. Ab biti cuácayat, uwat Sir tayar yajác, tayar batra chaca báreyra.

El sacrificio de Cristo quita el pecado

23 Cajc uch cut Sir ruw umá úbachan, soyan, icuran biyan eta jaw̄ sujacro. Cuacúr abá cuitar Sir imayan wan etar eta jaw̄ sujacro. Cuatán cuacúr abá cut Sir queney quin beyin acu ayan cuít sucuata binro. Ruwa ab cut caba súcuajatro. 24 Jesucristo is cuitar wacay yehnyat, Sir ruw umá ubach ícari raútiro. Uwat at cut tuw̄ jác ubach sari raútiro. Sir im úsian wan bi sar raútiro. Cuatán cuacúr abá im icar bijacro. Sir ima quin bijacro, is cuitar waquín acu. 25 Jesucristoat Sir quin is cuitar wacayat, sacerdote carat yajquíc ayan cuít yajacro. Sacerdote carat bara istiy, bara istiy, búcoyan, búcoyan ruwa ab ji Sir wiquíc usi rauro. Ima abi bár ey beya rabar rauro. Cuatán Jesucristo isat tayar yajác tunin acu bucoy, bucoy chíntiro. 26 Eyat cahmor sacerdotéinat yajquir eyta yajquir waquít, eyat récaji cajc cuanjác cuar búcoyan búcoyan chinata rehquíc óraro. Cuatán ah cutar cabar tin cab cu racayat ey wiquír car uwat tayar yajacan icar istanác bahnác caba túnjacro. Ima chinír cuitar, icar istanác caba bahnác túnjacro. 27 Eyta cat Sirat uw bahnáquinan icar istán chinín acu waquir chájacro. Chinyat Sirat uw eyin urá wahitín acu waquir chájacro. 28 Eytaan wan Jesucristoan uwat Sir tayar yajác tunin ac icar istán chinjacro. Etar bucoy cat wicáyqueyra. Bucoy wicayat, uwat Sir tayar yajác tunin acui wica báreyra. Cuatán im uw si beyin acu wicáyqueyra. Biyin ima wiquíc acor séoti ityat, eyin si beyin acu wicáyqueyra.

10 1 Bachan chihtán cuitar Sir chihtá bahnaqui ehcútiro. Bahnác bár cuar, chihtá eyan Sir chihtá quéseyaro. Yahncút ehcwata quéseyaro. Eyta bira chihtá ey cuitar uwan Sir jor tan wan chaquin acu yajquít cat cábai batro.

Uwat Sir owár tenan sehṵar, bara istiy, bara istiy ruwa wahnár, Sir ac wícaro. Eyta cuar ruwa wahnár wiquir étana cuitar, Sir tayar batra chácajatro. ²Eyta wahnár wiquir cuitar tayar bár chácatair waquít, Sir acu ruwa wahníc ey cat etata binro. Sir acu ruwa wahn áyqueyin tayar bár waátair waquít, eyin táyarat acsar cuácajar binro. ³Uwat bara istiy, bara istiy Sir acu ruwa wahná rabar, imát Sir tayar yajác tamo síhṵaro. ⁴Eyta cuar ruwa wahnár cuitar vaca ab cabir ab bir cuitar, uwat Sir tayar yajác bitách túnajatro.

⁵Eyta cuácayat Jesucristo cajc uch cut wiquír car Sir quin wajacro:

Siru, uwat bah quin ruwa wahnár wiquey bahat ey rácarí batro. Bahat ey rácarí bár etar asan sibár ji yehn áyjacro. ⁶Uwat tayar yajác tunin ac ruwa racar wahnár wiquic cuar bahan ey rácarí batro. ⁷Bahat ruwa ey racar bár etar aját wacaro. Bah carit cuitar as ojcor cuihsujaquey aját wacaro: “As usár rajacro. Siru, aját bah chihtá yajcáy rajacro.”

Sir carit cuitar eyta cuihsú bahjacro. ⁸Sir carit cuitar récaram uchta wajacro. Ruwa yawwir wahnár wíqueyan Sirat rácarí batro. Tayar yajác tunin ac wíqueyan, Sirat rácarí batro. Ey wahnár wíccayat Siran ahní batro. Eyta wajác ojcor síhṵawi. Bachan chihtán cuitar eyta wahnár wijac cuar, Siran ahní batro. ⁹Etar cutar Jesucristoat wajacro: “Bi yajcáyatan bah ahní chácatatara, aját ey yajcáy rajacro,” wajacro. Sir ima wacját eyta waquír cuitar chihtá cahmor bi tehmár chihtá istiy chájacro. ¹⁰Chihtá yahncút bi cuitar isan ur ay rehcayta acu Sir imáy ajquír chájacro. Jesús sibár yawwir cuitar, uw ur ay caba waayta acu Jesusan icar istán chinjacro.

¹¹Sacerdote bahnáquinat riy istiy, riy istiy Sir acu ruoro. Bucoy, bucoy ruwa wahnár uwat Sir tayar yajác tunin acu wiquic cuar, ey cuitar Sir tayar caba túnajatro. ¹²Cuatán Jesucristo iman icar istán chinír cuitar, uwat Sir tayar yajác caba túnjacro. Eyta tunir car Sir owár cuacúr itay raújacro. Erar Sir owár uw ayin acu itay yehnjacro. ¹³Ima quehsí eyin Sirat cuac oceso tas eya Sir owár itay raújacro. ¹⁴Jesucristo icar istán chinír cuitar icar istán aban to bir cuitar, Sir ub cahmar uw ur ay waayta acu chájacro. Býinan Sir imáy ajquír chájactara, Sir ub cahmar ur ay waayta acu chájacro.

¹⁵Sir Ajcan Cámuran Eyat cat is quin im eyta uní wajacro. Eyat Sirat wajaquey carit cuitar uchta cuihsujacro:

¹⁶Etar cab cucayat aját chihtá istiy cháquinro. Asan israelin owár tan wan chaquin acu chihtá istiy cháquinro.

Chihtá eya eyin ur icar cháquinro. Eyin ur icar imár bitara itic síwayta chihtá cháquinro, wajacro.

¹⁷Eyta waquír acsar cat wajacro:

Eyinat as tayar yajác tamo aját sehṵa báreyra. Eyinat tayar yajác eyan aját sicor tayar bár cháquinro, wajacro.

¹⁸Sir tayar yajacan tayar bár chajac etar ahra icúr acui ruwa wahnár wíccajatro.

Debemos acercarnos a Dios

¹⁹Eyta chihrtara isat Sir ima quin rooti tenátaro. Jesucristo chinír cuitar, isat tayar yajác tunjac etar Sir quin rooti tenátaro. ²⁰Eya sibár ji uchta chinír cuitar, isan Sir jor itay cuwín acu Sir jor tenan acu isan Sir ub cahmar ay orac chájacro. Chinír sicor estají yehnjác eyat eyta chájacro. Chihrtá yahncút ey cuitar tenan ac eyta orac chájacro. Cahmor sacerdotéin ruwa umá ubach sar oya rujac wicán sar rauwir eyta, Sir wiquíu usi rauwir eyta, isat ahra Jesús chihrtá cuitar Sir ima quin rooti tenátaro. ²¹Etarwan eyat Sir quin is cuitar waquíu acu sacerdote caran cuít bi yehnjacro. ²²Eyta bira isat Sir quin rooti tenátaro. Isan Sir sasá rehquíu, rooti tenátaro. Eyat is ur ay chajac etar eyta tenátaro. Jesucristoatan isat tayar yajáqueyan tayar bár chájacro. Isat ur ay bár yajquíu tayar ji síhwáquey cuiquin acu isan tayar bár chájacro. Is sibará cat rih sar siw̄ jacro. Eyta bira Sir quin rooti tenátaro. ²³Síratan wajáqueyan tehmó báreyra. Eyta bira uw cac cahmar ey wiquíu acor itay rajac eyta wácati acsar ey acor ítataro. ²⁴Uw rahra rahra sehnác chácyta acu ur ay chácyta acu íjmarat bitara yajquíntara bow̄ yajcátaro. ²⁵Eyta cat cahujinan owár secuac etíc cuar isan etiti sécuataro, Sir ojcor conín acu. Isan secuac etiti cuaquir Sir chihrtá ay yajcayta acu rahra rahra tew̄ átaro. Jesucristo sicor cajc uch cut wiquíu cab cuquíu etar isat rahra rahra cuít tew̄ átaro.

²⁶Isat ur ay bár yajti acu rahra rahra tew̄ tieyra, acsar ur ay bár yajcata óraro. Isat Sir chihrtá rahjác cuar, íjmár chihrtá cuitar ur ay bár icar áyeyra ey tayar yajacan túnajatro. ²⁷Tayar túnajar cuácayat, Sírat cuecuc cahmar roota óraro. Cab oc icar ruh̄w̄ úc cahmar roota óraro. Cab ocat Sir quehsí binan bahnác sutáyqueyra. Eyta chihrtara isat ey chihrtá rahjác cuar, ur ay bár icar áyeyra, ey cahmar roótaro. ²⁸Bachan chihrtán cuitar waquíu, uwat ruh̄w̄uyat ques, cab rehti yawwata wajacro. Cuisa bucáy tara, báytara binat ey cahm icar tew̄ yatra, cab rehti yawwata wajacro. ²⁹Cuatán uwat Sir chihrtá sinir cat, waca técyat, Sir ima wacjá bayuro. Jesucristo Sir chihrtá yahncút bi ehcuquey uwat istayta acu ima ab bijacro. Cuatán cahujinat ab ey ajcá bár chácáro. Ey ab cuitar Sir ub cahmor ur ay chajac cuar, ab bijaquey ajcá bár ruh̄w̄uro. Ey chihrtá waca técyat, Sir Ajcan Cámuran Ey tec chícáro. Sir Ajcan Cámuran Eyat uw racar rehquíu obir yajcata cuar, ey tec chícáro. Uwat ey chihrtá rahjác cuar ajcá bár chácayat ques Sírat cuít cuécwayqueyra. Bachan chihrtán ruh̄w̄ úc ques uwan yawwata réhctara Sir ima chihrtá ajcá bár chácayatwat, Sírat cuít cuécwayqueyra. ³⁰Sírat ima carit cuitar wajacro: “Tayar yajác ques ajatá cuécwata binro. Eyta bira ajmarát ey ques cuécunro,” wajacro. Uchta cat wajacro: “Sir imát ima uwa urá istáyqueyra,” wajacro. ³¹Etarwan uwan Sir cuecuc cahmar ay wini rehcatáro. Síran ajcan urán cuít bi cuácayat ey cuecuc cahmar ay wini rehcatáro.

³²Behmarat récaji yajác tamo síhw̄awi. Baat récaji Sir chihrtá sinyat, uwat ba abáy ruh̄w̄ujacro. Ruh̄w̄ ú tacat ba tan újacro. ³³Cab istiy, cab istiy baan uw cac cahmar ruh̄w̄ujacro. Ba quin ahsín tew̄ jacro. Eyta cat cab istiy, cab istiy behmár ruh̄w̄uti cuácayat, cahujín ruh̄w̄uyat, baat rooti eyin obir yajacro. ³⁴Cárcel icar

tunjáqueyin tamo sihw̄ar baat eyin obir yajacro. Uwat ba icúr bi chiw̄íc tacat, ba turti cuar ahní rehjecro. Behmár acu Sirat cuacúr icuran biyan ayan cuít bi báhnajar bi chajac sihw̄ar, ahní rehjecro. Baan cahmor echí eyta binro.

³⁵Eyta chih tara, acsar cat uw cahmar ayú rehti Sir chih tá yají quen rahcwi. Sir tamo yají síhw̄awi. Eyta yají quen rahcyat, yají síhw̄ayat, Sirat ba ac ay yajcáyqueyra. ³⁶Ba Sir chih tá séoti yajquíc sínata binro. Eyta sinyat, Sirat bitara yajquín wacayat, baat eyta yajcáyqueyra. Eyta yajcayat Sir imat ba ac ay yajquín wajaquey, eyat tehmoti im eyta yajcáyqueyra. ³⁷Sir carit cuitar uchta wacaro:

Wicata eyan birách rehti is cajc cut wicáyqueyra. Birách cuanti wicáyqueyra. ³⁸Cuatán as uwa ur ay binat as chih tá yají quen rahcuír cuitar ityat cuacúr asi jor ítayqueyra. Cuatán uwat ruh̄w̄ ú cahmar as chih tá waca técayat as eyin owár ahní batro.

Sir carit cuitar eyta wacaro. ³⁹Isra ruh̄w̄ ú cahmar Sir chih tá waca teta bini batro. Isra cuácata bini batro. Cuatán isat Sir chih tá wácati caquin acu tan ucata binro. Eyta wácati caquic rehquít is urán ajcan cuácajatro.

La fe

11 ¹Uwat Sir chih tá uní quen rahjác rehquít, Sir tamo uní quen síhw̄ajac rehquít, Sirat is acu ay yajquíc acor séoti itro. Sirat wácati yajcata uní quen síhw̄ajac rehquít, eyta itro. Uní quen rahjác rehquít, Sir tamo uní quen síhw̄ajac rehquít, uwat ima ub cuitar uchta istiti tacat, Sirat uní wajác séhw̄aro. ²Sir chih tá uní quen rahjác rehquít, Sir tamo yají síhw̄ajac rehquít, úchicrias cohtín Sir ub cahmar ur ay waajacro.

³Sir chih tá uní quen rahjác rehquít, Sir tamo uní quen síhw̄ajac rehquít, uchta síhw̄aro. Sirat ajc tew̄ír cuitar, cajcan teyan, cuacúr aban, bahnác cuanír chajac chih tá síhw̄aro. Icúr bár sicar bin uchta bahnác oror chajac chih tá síhw̄aro.

⁴Uní quen rahjác rehquít, Sir tamo uní quen séhw̄ajac rehquít, úchicrias cohtín Abelat Sir ac wiquin ruwa wahnjacro. Abelat Sir ac wijac eyan Sirat ítitan, ayan cuitro. Abelat wíjaquey Sirat ahní cájacro. Cuatán ey rab Cainat wijac eyra Sirat ítitan, etáy batro. Sirat Abelat wíjaquey cácyat, uwat ítitan, Abel Sir ub cahmar ur ayro. Abelra chinjác cuar, aha cat úwatan Abel tamo síhw̄atan, eyat Sir chih tá uní quen rahjác síhw̄aro.

⁵Sir tamo uní quen séhw̄ajac rehquít, úchicrias cohtín Enoc chinti cuar sibár ji cuacúr yehw̄ béjecro. Eyta bécayat uwat ey bísartar ístítiro. Sir imát yehw̄ bejec etar, bísartar ístítiro. Enocan anto cuacúr beti cuat, Sir ub cahmor ur ay ítchaquinro. ⁶Uwan Sir tamo uní quen síhw̄atitara Sir ub cahmar ur ay waa báreyra. Bíyinatán Sir quin con cun reh cáyatan, “Siran uní quen an esar,” síhw̄ataro. Uchta cat síhw̄ataro: “Bíyinan Sir jor it cúntara, Sirat eyin acu ay yajcata,” síhw̄ataro.

⁷Sir chih tá uní quen rahjác rehquít, úchicrias cohtín Noeat im owár itquin síujacro. Sirat Noé quin anto cajc cutar rih cuinti cuar echí, waquír chájacro. Uw bahnác bahnín waquír chájacro. Sir imát eyta wacayat, Noeat uní seh̄war rahjacro.

Rahcuír car, Sir ajcá ji chaquir rih arcutar beyin acu ubach órojocro. Ima cat im owár itquin cat sácati acu órojocro. Noeat Sir chihtá eyta rahjác rehquít, cahujín éyinatra Sir chihtá ajcá bár ruhw̄ujác ehcujacro. Noera Sir ajc rahjác rehquít Sir ub cahmor ur ay waajacro. Uwan Sir chihtá uní quen rahcuíc rehquít Sir ub cahmor ur ay waata eyta Noeat cat Sir chihtá uní quen rahjác rehquít ur ay eyta waajacro.

⁸Sir chihtá uní quen rahjác rehquít, Abrahamat Sir chihtá yajacro. Sir imat ey quin cajc wiquin wacayat, Abrahaman ey chihtá rahjác rehquít erar bijacro. Birar cuwín bíctara istiti cuar bijacro. ⁹Sir ajc uní quen rahjác rehquít, ima quin wícata cajc ey cutaran cahujín cajc cut itir eyta ítchacro. Isaaquin owár, Jacobin owár birar urar oya chohcha cahm camot itot béjacro. Abrahamin quin, Isaaquin quin, Jacobin quin, Sir imat eyin owár bin quin cajc wiquin wac bahjáquinro. ¹⁰Abraham cuacúr Sir jor itin sehwar oya chohcha cahm ohbac ítchacro. Cuacúr Sir pueblo cuácajar binro. Pueblo eya Sir imát tuw̄ jáquinro.

¹¹Sir ajc uní quen rahjác rehquít, Sir tamo uní quen séhw̄ajac rehquít, Abrahamat wacjá cohnajacro. Sasara yehn cat werjáy rehjecro. Wiya cat chauwíc rehquít sasá cóhnajatro. Eyta cuar wacjá cohnajacro. Sirat ima quin uní quen wajác séhw̄ajac rehquít eyta cohnajacro. ¹²Sir ajc uní quen rahcyat, sera istán sicar, Abraham sicar bómcarinan acsar acsar saw̄ ú bálnajar cohná bahjacro. Abraham werjayát bar yaric cab cujác cuar, Sir ajc cut bómcarin ricá cuít cohná bijacro. Cuacúr abá sar uba sáw̄ajar eyta, yacúr cajc cutar cat umít sáw̄ajar eyta, Abraham bómcarin cat ricán eyta cohná bijacro.

¹³Eyin bahnaquin quin Sirat wiquin wac bahjáqueyan witi cuat sácajacro. Eyta witi cuar, éyinat síhw̄atan: “Awan cuacúr Sir quin cucayat, Sirat ey wácati wícaqueyra,” síhw̄ajacro. Eyta sihw̄ar ahní rehjecro. Eyta sihw̄ar imár ojcor síhw̄ajacro. “Isra usár bini batro,” síhw̄ajacro. “Cajc uch cut isra inic obir itro,” síhw̄ajacro. ¹⁴Bíyinatán eyta síhw̄ayatan, éyinan imár quin cajca wiquic acor itro. ¹⁵Eyin récaji rojóc bin cajc cut sicor bec cun rehjequir waquít, éyinan sicor bar béyata yajacro. ¹⁶Eyta cuar sicor bec cun bár rehjecro. Cuatán Sirat wiquin wajác cut itay bec cun rehjecro. Sir owár cuacúr itay bec cun rehjecro. Eyta cuácayat Sirat eyin beyin cahmar cuacúr abá cuitar pueblo chájacro. Etarwan Sirat wacaro: “Asan Abraham acu Sitro. Isaac acu Sitro. Jacob acu Sitro,” wacaro. Eyta ahní tew̄ro.

¹⁷Sir ajc uní quen rahjác rehquít, Abrahamat Sir ria cájacro. Sirat Abrahamat ima chihtá cácatatara, cácajartara wahitín ac ima waquj istán bi Isaac yauwin wajacro. Eyta wacayat, Abrahamat eyta yajquin yehnjacro. Récajian Sirat Isaac sicar bin bómcarin saw̄ ú bálnajar wiquin wajáquinro. Eyta cuar, Abrahamat Sir chihtá cuitar ima wacjá istán bi yauwin yehnjacro. ¹⁸Wacjá ey ojcor Sirat wajacro: “Bah wacjá Isaac sicar bin behmá bómcarin saw̄ ú bálnajar cohnáyqueyra,” wajacro. Eyta wajác cuar, Sir ajc uní quen rahjác rehquít, ey yauwin yehnjacro. ¹⁹Eyat séhw̄atan, chiníc tacat, wacj eyan Sirat sicor estají yehn áyata séhw̄ajacro. Eyta séhw̄ajac etar Isaac chein wan rehjec cuar, estají rehjecro.

²⁰ Sir tamo uní quen séh̄w̄ajac rehquít, Isaacat Sir quin Jacobin cuitar Esauin cuitar conjacro.

²¹ Sir ajc uní quen rahjác rehquít, Jacobat yarin inár José sasá bucáy bin cuitar Sir quin conjacro. Jacob cuisa bahú chaquir ima tec ojcor canojocro. Eyta canór eyin cuitar Sir ojcor conjacro.

²² Sir ajc uní quen rahjác rehquít, Joseat cat yarin inár Israélinan Egipto cajc cut bin cajc istiy cutar beyáyqueyra, wac bahjacro. Ima chein carar cat bahti beyin acu wac bahjacro, cajc ey cuitar ruhcuayta acu.

²³ Sir tamo uní quen síh̄w̄ajac rehquít, Moisés yehnyat tetinát abinát yauti acu ruhjacro. Ruhcuiran sihyór bay ítchacro. Moisés óriquen etar, yauti ac ruhjacro. Egipto reyat serin sasá bahnác rih aw̄at yehw̄ tijca wajác cuar, éyinat ey ajc cahmar ayú rehti cuar, Moisés ruhjacro.


²⁴ Sir tamo uní quen séh̄w̄ajac rehquít, Moisesan caba cun yehnyat, im ojcor “Faraón wihná,” aw̄ ú áytiro. ²⁵ Eyra Sir uw cuac sácaquin owár it cun rehjecro. Egipto reyin owár ahní jaquin acu ay bár yajquíc sin cun bár rehjecro. Cuatán israelin owár it cun rehjecro. ²⁶ Eyat ítitan, Egipto reya oyan, rayan cuitro. Icuran biyan ajc bahnacro. Eyta cuar uwat Cristo ques ruhw̄ úc tehmár, Sirat ayan cuít bi wícata séh̄w̄ajacro. Eyta seh̄w̄ar israelin owár, Sir uw owár it cun rehjecro. Egipto uwat eyin ruhw̄ úc tacat, eyin owár it cun rehjecro. ²⁷ Sir ajc uní quen rahjác rehquít, Moisesan Egipto cajc cut bin waa béjecro. Egipto rey turjac cahm rooti cuar béjecro. Uwat ima ub cut Sir uchta ístajar cuar, Moisesat seh̄w̄at, Sirat imár bar obir yajcata síh̄w̄ajacro. Eyta seh̄w̄ar, Egipto cajc cut bin síh̄w̄a sácatai waa béjecro. ²⁸ Sir ajc uní quen rahjác rehquít, Moisesat israelin quin obas yauwin wajacro. Cheycar aracat bijaquey waa bic fiesta tinyat, Pascua fiesta tinyat, obas yauwin wajacro. Uní quen rahjác rehquít israélinat obas ab querat cac aw̄at ójocro. Quesmatin tiw̄ in yájquibat israelin imár quesmátinra tiw̄ti chac bahyta acu eyta ójocro.

²⁹ Sir ajc uní quen rahjác rehquít, israélinan yacúr ajc Buwáy rahray waajacro. Riw úbotosa cajc bar injacro, israelin rahray waan acu. Eyta waajác etar Egipto uw cat im eyta beyin yinjacro. Eyta cuar eyin becáyatra yacúr rihan bahnác cuhchacúch cay tas chaquir sácajacro.

³⁰ Sir ajc uní quen rahjác etar, Jericó pueblo rúhracat israélinan riya cucuí béjecro, quer bahnác quihú beyta acu. Pueblo rúhracat eyta bejec etar pueblo rúhracat quer bahnác quihú téjecro.

³¹ Sir tamo uní quen séh̄w̄ajac etar, wiw̄ á isarib ajca Rahab yau ayti sújacro. Sir chih̄tá cati bin sicar bin yau ayti sújacro. Eyat israélinat ima pueblo uron behjec eyin ruhw̄uti obir yajác etar, yau ayti sújacro.

³² Acsar cat cahujín ojcor ricá to bin ojcor cuít ehcwata cuaquir cat ehcú bahnajatro. Gedeonat yajác cat, Baracat yajác cat, Sansonat yajác cat, Jefteat yajác cat, Davidat yajác cat, Samuelat yajác cat, Sir chih̄tá ehcuquin cahujinat yajác cat ehcwata cuaquir cat ehcú bahnajatro. ³³ Sir ajc uní quen rahjác rehquít, Sir tamo uní quen síh̄w̄ajac rehquít, éyinatán cahujín cajc ahár siwir imaray



(Hebreos 11.33)

cájacro. Eyinan ur ay yajca rabar uw acu carin chájacro. Sir imat eyin acu ay yajquín wajác etar, Sirat im eyta yajacro. Sir ajc uní quen rahjác etar, cohtocuat eyin cohti sera waajacro. ³⁴Eyin ocat wahnti sera waajacro. Eyin espada cuitar yauti sera waajacro. Eyin canar bár cuar chihchirán cuít rehjecro. Eyinat tec quejn yinír, cahujín burbar yajacro. Eyinat cahujín uw soldádoín bahnaquin cui áyjacro. ³⁵Eyin sicar bin sas abín acu sasá sácajaquin sicor estají yinjacro.

Sir uw cahujín Sir chihotá ajcá bár wácayta acu questár ruhwujacro. Eyta ruhwujác tacat, ricuá ayti cuar, Sir chihotá wácati sácajacro. Sir jor cuacúr itin sihwā rabar ey chihotá wácati sácajacro. ³⁶Eyin sicar cahujinan, uwat imár buror sisíc tacat, Sir chihotá wácati tan újacro. Cahujín caruc cuitar buquíc tacat, Sir chihotá wácati tan újacro. Cahujín yera chistár cut questajác tacat, Sir chihotá wácati tan újacro. Cahujín cárcel icar chajac tacat, Sir chihotá wácati tan újacro. ³⁷Eyin sicar bin cahujinan ac cut tiw̄ir sácajacro. Cahujinan ubut oco serrucho cut rihr tíw̄ jacro. Cahujinan espada cuitar tíw̄ jacro. Cahujinan obas umá, cabir umán, cuáyinan wan ow̄ jacro. Oya bár, ray bár ítchacro. Uwat eyin ruhwujacro. Eyin técuajacro. ³⁸Eyin ubach bár cuitaran, ruhr cut sihyó asta cahm camot itot béjecro. Sihyó behná cahm camot itot béjecro. Eyta cuájaquinan urán ayan tahnacro, cahujín yajquít acura.

³⁹Uw éyinan Sir ajc uní quen rahjác cuar, eyin at icar Sir imat wiquin wajaqueyan witi sácajacro. ⁴⁰Sirat eyin quino cat is quino cat ayan cuít bi wiquin sehwar, eyin quin récaji witi rehjecro. Is quino cat eyin quino cat owár bin quin caba wiquin sehwar, eyin quin récaji witi sácajacro.

Fijemos la mirada en Jesús

12 ¹Cahmor ricán to binat Sir ajc uní quen rahcuír yajác cuitar isat cat bitara yajcata bintara ehcú bahjacro. Eyta bira is ruhw̄ úc tacat, isat cat tan ucátaro. Icrát biyat Sir tamo sihw̄ ayti rehcayat, isat eyta sihw̄a ayti ey ajcá bár jácataro. Isat bitara útara ur ay bár yajc cun rehcayat, yajti etátaro. Eyta yajti cuar Sirat isat bitara yajquín wajaquey wácati yajcátaro. ²Isat eyta yajca rabar Jesús tamo síhw̄ataro. Jesusat récaji Sir chihotá uní quen rahcuír yajác tamo síhw̄ataro. Eyat Sir chihotá rahcuír caba yajacro. Yahncút ahnian cuít rehcata sehwar, caruc ojcor chinata tacat conti tan újacro. Caruc ojcor quejcayat uwat ey ójcoran ajc ahsín tewata itchacro. Im ojcor eyta tewata itchác tacat, Jesusat ey tamo sehwa yártiro. Séhw̄ati cuar conti tan újacro. Etar ahra cuacúr Sir owár uw ayin yehnjacro.

³Eyta yajác tamo síhw̄awi. Ur ay bár binat ey quehsí rehca tacat tan újacro. Ey tamo eyta sihw̄a rabar séoti jaw̄ i. Uwat ba ruhw̄ úc tacat ba séoti jaw̄ i. Cue rehti jaw̄ i. ⁴Uwat Sir chihotá ques ba ruhw̄ úc tacat ba wácati tan úcaro. Eyta cuar áhajira ba yaúwini ahnútiro. ⁵¿Sir carit cuitar ba tan uquin acu wajác ey baat bar tan chinyi? Ey cuitar wajacro:

Wacjú, Sirat bahat ur ay bár yajti acu cuéwayat, cuéwayar bi cuécujac síhw̄ati jaw̄ i. Bucoy ay bár yajti acu cuécujac, síhw̄awi. Bucoy bucoy cuéwayat, séoti jaw̄ i. Cue rehti jaw̄ i. ⁶Síratan biyin sehnáctara éyinat ur ay bár yajti acu cuécuro. Tetát ima wacján sehnác rehquít, ur ay bár yajti acu tecuar eyta, Sirat is cat eyta cuécuro.

⁷Sirat ur ba ay bár yajti acu cuéwayat, cue rehti tan uw̄ i. Ur ay yajquíc sinwi. Uwat ima wacjá tecuar eyta, Sirat ba cat eyta cuécuro. Baan Sir sasaro. Etar cuécuro. Uwat ima sasá ur ay bár yajcayac, técuatira yajca báreyra. ⁸Sirat ba cuécuti chaquir waquít baan ima sasai bár etar cuécuti chaquic síhw̄ataro. Ba teti bár etar eyta chaquic síhw̄ataro. Sirat ima sasá bahnáquinat ur ay bár yajti acu cuécuro. ⁹Uchta cat síhw̄awi. Cajc uch cut íjmár tetinát isat ay bár yajti acu técuaro. Eyta técuayac isat eyin ajcá ji bécaro. Eyta cuácayacwat, cuacúr Tet cat ajcá ji beyátaro. Eyta ajcá ji bécayat isan cuacúr ey jor ítayqueyra. ¹⁰Isan cajc uch cutar inic obir itic cuaquir, tetinát íjmár tamo síhw̄ar is quin ur ay bár yajc ayti acu técuaro. Is tetín imarat síhw̄at, isan bitara técuata bintara eyta técuaro. Cuatán Sirat is tamo sehwar isat ay yajcayta acu cuécuro. Is urán im ubot ur ay waayta acu cuécuro. Iman ayan cuít chihotara is cat im eyta rehcayat acu eyta cuécuro. ¹¹Isat ur ay bár yajti acu cuéwayat, ínicra yar wíniro. Récaji ohbac batro. Eyta cuar ítchareht yájcajareht, bíyinatán cuécui cuitar ur ay yajquíc sínyatan, éyinatán ur ay yajcaro. Ohbac itro.

El peligro de rechazar la voz de Dios

¹²Eyta cuácayac, uwat ba ruhw̄uyat ba cuac bec tacat, tan uw̄ i. Ba urá chi yinwi. Chihchír chi yinwi. Cuechín, chuchin ítiti jaw̄ i. ¹³Baat urá ay yajw̄ i. Uw ibit tuní aw̄at bir eyta baat cat ur ay éytaan wan yajw̄ i. Eytair

báreyra, ba chihtá cuitar ba cahujín cuechín chuchin ítquinat Sir chihtá bahnác waca téyqueyra. Ibit wan bár bi awāt bicayat quescar cuercúr acsar cuecwátaro. Quescara cuercúr acsar cuécwata eyta, cuechín chuchin ítquin cat Sir chihtá éytaan wan waca téyqueyra. Cuat baat ay yajcayat, cuechín chuchin ítquin cat ba chihtá cuitar sicor tan wan chácayqueyra.

¹⁴Behmár cuitatrun uw bahnaquin owár tan wan chaquin acu ay ítui. Behmár cuitatrun baan Sir imáy wácati rehquín acu cat ay yajwĩ. Sir imáy chátieyra, cuacúr Sir quin cuwa báreyra. ¹⁵Baat cahujín ay yajcayta acu ohbac tewĩ. Uw istiyát Sir chihtá ruhw̄ úctara, eyat acsar ruhw̄uti acu ajc uní cuitar wawĩ. Eyat Sir chihtá ruhw̄uti rehçayat, Sirat ey sehnác rehquít síwayqueyra. Uw istiyát Sir chihtá ruhw̄ úyeyra, cahujín quir binat cat istír car im eyta yajcáy yinata óraro. Eyta chih tara uw quin Sir chihtá ruhw̄ ú ayti jawĩ. ¹⁶Uw istiyát Sir chihtá ruhw̄ úyeyra, eyat isár yajquíc sínata óraro. Sir tamo síhw̄ati ítata oraro. Esaú urá eyta rehçata óraro. Esaú quesmatir chih tara icuran biyan imáy chácata eyan taná quin rajacro. Yayí rehquít, ira chistán istiy teh már rajacro. Séhw̄ati cuar rajacro. ¹⁷Eyta rar car ítchareht, yájçareht, ima tetát ima cuitar wacayta acu coníc tacat, tetát bitách wáçajar rehçero. Esauat o rabar coníc tacat, ey cuitar bitách wáçajar rehçero. Esaú imát réçaji eyta yajáqueyan, yahncút bitách téhmojoj rehçero. Cue rehca rabar conjác tacat, bitách téhmojoj rehçero.

¹⁸Baat bachan chihtán cuitar Sir owár téw̄ tiro. Baat bi chihtá cuitar tew̄ ítara eyan ayan Moisés cuitro. Israélinat bachan chihtán sinin acu Sinaí cubar ques çujacro. Sinaí cubar ques çujác cuara, cubar arcútatra sáhuwajatro. Sinaí cubar ques cur ítitan, ocan to yehnic ítchacro. Tinic cat íyarat ayar tinic ítchacro. Séroan cat abáy caquíc ítchacro. ¹⁹Erar cur ráhçuitan rubar çuhquíc rahçacro. Sirat ajc tew̄ ic cat rahçacro. Eyta rahçuír, ajc tew̄ ic rahçuír car ay wini rehçero. Ay wini rehquít, éyinat Moisés quin wajacro:

—Is quino Sir imatra tew̄ ti acu wawĩ i, wajacro.

²⁰Síratan uwat Sinaí cubar cut sáhuti acu wajacro:

—Uwtara, rúwatara chihtá çajac ey acsar sáhuweyra yawwátaro. Baat ac cut ey yawwátaro, wajacro.

Sirat eyta wacayat, uwat caba yájçajar síhw̄ajacro. Etat bar sácata síhw̄ajacro. Eyta síhw̄ar ehurát cuájacro. ²¹Moisés cat cubar icar bahnác eyta rehquíc istír áywini rehçero. Eyta rehquít wajacro: “Sir çahmor ehurát as yíworo,” wajacro. Israélinat chihtá eyta çajac ey cuitar Sir owár tew̄ jacro.

²²Cuatán bara Sir joran erar cuitari téw̄ tiro. Sir jor tew̄ ín acu baan cuacúr Sión cubar cuitar secuan yinjacro. Sir ima pueblo cuitar secuan yinjacro. Jerusalén cuacúr abá cuitar tuw̄ jác sar secuan yinjacro. Cuacúr abá cuitar Sir cacmín ricán to bin owár secuan yinjacro. Sir cacminát “Siran ayro,” cohwin acu owár sécuajacro. Ba cat eyin owár secuan yinjacro. ²³Sir sasá cat eyin owár sécuajacro. Eyin cuacúr beyin acu imár açan cuacúr cuitar carit cuitar cuihsujacro. Baan Sir cacmín owár, Sir sasá owár secuan yinjacro. Eyin owár cat uw urá wahitquib owár cat sécuayqueyra. Urá wahitquib eya uw bahnaquin acu Sir quényero. Erar

cat urá ay bi sácajac eyin ajca Sir ima jor itin acu tayar bár chájacro. Ba ajca eyin owár Sir jor secuan yinjacro. ²⁴Jesús owár cat sécuayqueyra. Jesús eyat Siran uw owár tan wan chácayta acu chihntán caba órojocro. Chihntá eya récaji istiti binro. Baan ey jor cat secuan yinjacro. Ab bijaquey owár sécuayqueyra. Ey aban ayan Abel ab cuitro. Jesús ab ey bijác rehquí, isan Sir ub cahmor tan wan chácáro. Cuat Abel ab bijác ques, Sirat Caín técuajacro.

²⁵Eyta cuácayat ba quin Sir chihntá ehcuquey ria cátira yajti jaw i. Cajc uch cutar Moisesat Sir chihntá ehcuajác cuar, cahujinat ria cati ruhw̄ujacro. Eyta cati ques eyin sera waati cuájacro. Eyta chihntara cuacúr bin Jesucrístóat is quin Sir chihntá ehcwayatwat, isat yají rahcuátaro. Eytair báreyra isan cuít cuéwayqueyra. Eyta cuecuc cahmar isan bitách sera waájatro. ²⁶Sirat récaram Moisés quin chihntá ehcwayat cat, Sir tew̄ íc ajcyarat cajcan teyan bahnác yiwojocro. Cuatán yahncutra uchta yajquín wac bahjacro.

Aját bucoy cat yiwonro. Cuat bucoy yiwoyat aját cajc étani yiwó báreyra. Cajc cat cuacúr abá cat yiwonro, wajacro.

²⁷Eyta wacayat, “bucoy cat” wacayat uch ojcor wacaro. Sirat bi yiwóyatan, eyan bahnác bahnáyqueyra. Ijmár ub cuít ítata ey bahnáyqueyra. Eyta bahní yahncút, yíwojor eyra im eyta rehcaçãoqueyra. ²⁸Eyta chihntara isat Sir quin “oquéy” wacátaro. Yíwojor bin, téhmojor bin Sirat is quin wiquín wajac etar “Oquéy, bah ur ayro,” wacátaro. Eyta waquír car Sir cahmar ay wini rehcação. Ey tamo síhw̄ataro. Ey ojcor conátaro. ²⁹Is síhw̄at Siran ocan wanro. Bahnác bahnata étarwan ocan wanro. Eyta chihntara isat ay wini rehquí ey tamo síhw̄ataro.

Cómo agradar a Dios

13 ¹Baan rahra rahra sehnác eyan etiti acsar eyta yajw̄ i. Rabin rahra rahra sehnár yajquír eyta baat cat eyta yajw̄ i. ²Uwa istiti bin ba quin cucayat baan eyin owár tan wan rehwi. Iran úbachan ruhwiuti wiw̄ i. Cahujinat eyta es yajti wiquir ítitan, imarat istiti rabar Sir cuacúr cacmín obir yajacro. ³Cárcel icar tunjác eyin tamo cat síhw̄awi. Behmár tunjác eyta síhw̄ar baat eyin tamo síhw̄awi. Uwat ruhwiúc eyin tamo cat síhw̄awi. Ba cat eyta ruhw̄ata síhw̄ar eyin tamo síhw̄awi. Eyin obir yajw̄ i.

⁴Yehwi bin jor cuic cut questa camti jaw i. Uw besir yajti jaw i. Ba bahnáquinat uw yehwi jaquin ajcá bi béowi. Ba besir yájcyeyra, isár yájcyeyra, Sirat cuéwayqueyra.

⁵Ba ray racar isoti jaw i. Ba icuran biyan chetar im ey tecut ohbac ítuwi. Sirat wajacro: “Aját ba obir yajquinro. Aját baistir bah báreyra,” wajacro. ⁶Eyta chihntara isat ohbac wacátaro:

Siran as obir yájqüibro. Etar as rooti ítinro. Uwat as ruhwiún yajc tacat bitarach batro, wacátaro.

⁷Ba carin tamo tan chinti síhw̄awi. Eyinat ba quin Sir chihntá récaji ehcuajáquinro. Eyinat bitara yajquír cuitara ohbac ítchactara, ey síhw̄awi. Eyta síhw̄ar car, éyinat Sir tamo síhw̄ajac eyta baat cat eyta síhw̄awi. ⁸Etar uch cat

síhwawi. Jesucristoan bur cut suw cut récaram cat, ah cutara cat, yahncút cat tehmoti im eyta rehcaro. ⁹Eyta cuácayat chiht istiy, chiht istiy rahcti jawĩ. Bach yajcata chihá siw̄ay yinyat rahcti jawĩ. ¿Behmár cayar yájcajaqui? Sirat is sehnác rehquít, is quin urá caba wícataro. Cuat cahujinat bach yajquír cuitar urán cuít yinín síhwat cat batro. Urá im eyta rehcaro. Eyta bira eyin chihtá rahcti jawĩ.

¹⁰Judío sacerdotéinat Sir jor tan wan chaquin acu ruwa yauro. Cuatán isan Sir jor tan wan chácayta acu ruwa yauti cuar ey ajc tehmar istiy chinjacro. Ayan cuít bin chinjacro. Eyta chinjac eyan judío sacerdotéin sicar binat bitách cóhjtro. Eyinan Sir ubach icar ruoquin cuar, bitách cóhjtro. ¹¹Sacerdotéinat ruwa ab uquir Sir wiquíc usar bécaro. Ab ey uquir car sura ey cat bitách cóhjtro. Cohti cuar pueblo acán cutar bahnác wahnata binro. ¹²Ruwan pueblo acán cutar wahnár eyta, Jesús cat pueblo acán cutar yaujacro. Uwat Sir tayar yajác tunin acu Jesús ab bir car chinjacro. Uwan Sir ima uw yinayta acu Jesús ab bir car chinjacro.

¹³Eyta cuácayat isan Jesús chiwa chácataro. Isat judfoinat yajquír eyta yájcajatro, Jesús owár chaquin acu. Uwat Jesús ajcá bár chaquir eyta is cat eyta ajcá bár chácata tacat isan Jesús chiwa yinátaro. ¹⁴Cajc uch cutar ísayan icuran biyan bahnajar binra batro. Cuácayat isra cuacúr beyic acor itro. Yahncút isan erar bur cut suw cut ítayqueyra.

¹⁵Jesusat chihá caba órojoc etar isat Sir ojcor ay tew̄átaro. Judío sacerdotéinat Sir quin “oquéy,” waquín ac ruwa yauwir wahnro. Cuat isat ey quin “oquéy,” waquín ac íjmár cuw cutar uw quin Sir ojcor ay tew̄átaro. ¹⁶Sir quin “oquéy,” waquín ac ur ay cat yajcátaro. Baay icuran biyan cahujín quin es yajti wiw̄i. Eyta wícayat, eyta yajcayat, Sirat ítitan, baat yarís yajcaro.

¹⁷Baat carin chihá caw̄i. Eyin ria caw̄i. Eyinat baat síhw̄ajar bin síhw̄ati acu siw̄ro. Imarat ba ac bitara yajáctara Sir quin ehcwata binro. Eyta bira éyinat Sir ub cahmor ahní tew̄ayta acu eyin ria caw̄i. Baat eyin ria ráhctieyra, éyinat cue cuar Sir quin tew̄áyqueyra. Cue cuar tew̄yat, ba acu ay batro.

¹⁸Is cuitar Sir ojcor conwi. Isat Sir ub cahmor urá tehmoti yajác rehquít óhbacko. Isat urá tehmoti icuran biyan ay yaj cun rehcaro. ¹⁹Aját ba quin uní wacaro. Is cuitar Sir ojcor conwi. As biráy cuanti ba quin ben ac Sirat ajc waayta acu conwi.

Bendición y saludos finales

²⁰Aját ba cuitar Sir ojcor conro. Sir eyan uw ohbac it áyquibro. Eyat is Cara Jesucristo chinyat sicor estají yehn áyjacro. Obas cayibat im obas obir yajquír eyta, Jesucristoat cat isan eyta obir yajcaro. Jesús ima chinír cuitar Sir jor uwa tan wan chácayta acu caba órojocro. ²¹Aját Sir quin conro, eyat ba ac bahnác ay bi wícayta acu. Baat ey chihá caba yajcayta acu eyta wícayta acu conro. Eyta wiquir cuitar ba urá ay chácataro. Jesucristo chihá cuitar urá ay chácataro. Jesucristo ey ojcor uwat bur cut suw cut im eyta ay tew̄átaro. Amén.

²²Rábinu, aját ba quin conro. Aját ba quin bitara yajquín wajáctara ey ráhctira yajti jawĩ. Aját carit biráy bár bi cuihsujacro. ²³Uch rahcwi. Is rab Timoteo

cárcel icar bin bar újacro. Eya usár in wicayat, isan buc owár ba quin béyinro. ²⁴Aját ba carin bahnaquin tamo cat, Sir sasá bahnaquin tamo cat séhw̃aro. Eyin quin eyta waw̃i. Italia cajc cut binat cat ba tamo sihw̃ac wac ayro. ²⁵Aját ba cuitar Sir ojcor conro. Sirat ba sehnác rehquít obir yajcayta acu conro. Amén.